

春在堂全書

第十二冊

春在堂稌文六編三

德清俞樾

少蘭翁君傳

君諱傳煦姓翁氏湖南善化人福建鹽法道署按察使
蘭畦公之長子也其世系詳余所撰蘭畦公家傳君兄
弟二人分父之字以爲字故君字少蘭而其弟傳照則
字少畦後君在閩寓闢一齋少蘭名之曰魯君大喜曰
甚善甚善遂自號魯齋云君之生也蘭畦公方爲福建
莆城縣丞生八日而粵賊石達開自鉛山來犯公率兵
拒之於二渡關母高夫人在署中或傳兵敗矣乃以君

付乳媪命速從其夫去而自握印挈二女坐井闌曰賊至則同死井中矣已而公戰大捷賊退乃始營求得君於四十里外襁褓中經歷大險竟無恙稍長課之讀讀不能多然能闇記終身不忘六歲懸腕書大字十一歲作小楷書十二歲作草書皆深得古法蘭畦公甚奇君嘗問汝知我作官樂乎曰百姓樂便樂矣公笑而頷之十五歲代父作書札曲盡事理光緒六年母高夫人病危君每日步禱於烏石山之神神廟在山巔風雨寒暑無間午夜則露跪中庭望北斗叩頭求延母命如是者一年母病竟愈人以爲孝感其明年兄弟同回楚應試

聞鄉里閒貧戶多溺女者君惻然與少畦謀以是年所
入田租益以行囊所齎得錢如干凡生女貧不能舉者
資助之居一年活女嬰六十有餘卡頌臣中丞聞而嘉
焉書爲善最樂四字贈之非君意也中丞因是創設救
嬰局於長沙城中君亦蠲金以成其事計其金值穀千
石中丞將聞於朝請以樂善好施四字旌其閭君辭
甚力中丞曰吾且成其高遂已其後中丞督閩浙君適
仕閩未嘗以一牘相干也八年蘭畦公卒於位九年春
高夫人又病乃使少畦奉父喪航海歸而君奉母陸行
至浙之衢州母旋卒少畦又奔赴與俱歸治葬如禮旣

免喪與少畦家居家中藏書甚富夏必曝之於庭立烈日中不知熱雪夜屋漏數起守護不知寒人問何自苦乃爾曰吾父以授弟讀者也少畦請編輯家乘君則大喜曰吾弟此舉可謂有志矣居久之少畦以貧故勸君仕不聽勸之益切君初以蘭畦公助晉振移獎得場大使乃遵海防例以遇缺先注選籍光緒十六年選授福建潯美場大使場官故與胥吏朋比若左右手吏亦不知官尊視若雁行然君初任事有吏魁用敵體禮來見闖者白某人拜會君怒曰吏也敢爾邪命翼日堂見羣吏皆聳而君治事寬嚴相濟定各哨功過賞罰章程無

不悅服商船渡海例給驗符雖至丙夜必起爲鈴印不
使留待明晨曰無誤其順風也鹽船持照配鹽或船至
照未至許其自陳如數配運曰無使徒糜旅費也鄉間
載薪來售者出口必令繳半課君曰無鹽何課也如不
裝鹽免其繳課民皆感之初永春之民以新章計口銷
鹽課增民病有陳拱者以此倡亂煽惑甚眾負販之夫
麇聚於一村落中曰林井抗不納課君單騎馳往以禮
延見其父老出條教二嘉其守法者而戒其違者人心
帖然又訪知蕭下鄉販私者以某某爲魁名捕得之械
而巡於市一時改業者甚眾君在官不受分外一錢除

夕檢囊中止存錢千笑曰以此度歲清且閒矣有方豹
侯者舊受蘭畦公恩知君貧以百金餽不受因以書告
少畦曰撤掇萬難之時力卻此金老兄亦可謂懸厓勒
馬矣少畦以君爲場官無可展布徒博人稱廉吏亦無
謂也乃賣田爲君捐輸開原缺以同知侯補去潯美曰
民皆執香送輿前後相望而曩時用敵體禮來見之吏
亦叩首車下走送八十里而後去君入都引見還及
滬少畦亦自湘至滬相見論吏治得六十四則是曰書
生初見其年冬少畦亦以知縣仕江蘇君初不以少畦
出山爲然蓋曩時父書留與弟讀之意也然少畦之才

實已可仕亦不固止之與少畦書封題二弟爲國爲民
六字其兄弟相規切異恆情遠矣旣至閩奉檄充鑪市
釐局委員其地距省遠釐亦極微君訪求積弊裁汰陋
規徵收逾額而私用奇窘又水土甚惡從者病有死者
君歎曰昌黎之詩不云乎致汝無辜由我罪并前官僅
僕死於是者而薤葬之籌經費以祭之嗚呼可謂仁矣
旣報滿受代還省踰半年得閩安分局之差而忽聞少
畦在鎮江大病航海來視止之不可及至已愈而君忽
大嘔血十數盃皆滿先是君家居時曾患瘡自首達踵
浮腫若瓠菡屨皆絕醫者謝不爲少畦禱於神請以身

代已而果愈少畦謂神允其請預爲死計而亦不死然
兄弟兩人自此皆善病矣君嘔血凡十餘日始稍止少
畦諷君改官近省君以幸官先人遺愛之邦不忍棄仍
至閩閩督邊公寶泉及鹽道余公聯沅皆甚重之命筦
泉永官運總局兼理安溪永春永春乃蘭畦公舊治也
君喜曰吾得拜永春民建之翁公祠矣然又歐血血止
又患瘡少畦每日必禱於神申以身代之請君時劇時
瘡力疾至泉州書數語寄少畦曰沿途辛苦果如所料
瘡又作矣此絕筆也光緒二十二年十二月庚寅卒於
泉州年三十有七君凡事退讓若不勝任而任事之勇

壯夫不能奪其言訥訥然而他人百思不能易其言性
好施與見貧者必賙之或曰彼僞耳君曰皆疑其僞則
窮人餓死矣在家時有湘陰令忤上官調辰溪虧帑銀
甚鉅君僅與一面聞其語所親曰廉名吾不忍敗有死
而已乃質田得二千金又貸於人得二千金代償之方
書田券時有奔告者曰辰溪之檄又撤矣少畦目視君
君若不聞者書券如故在閩時有同官素不相識卒而
無以斂君質衣得洋錢十易錢萬使人與之餘錢數百
買水仙花二盆繼而悔曰何不卽以餘錢畀之乎妻徐
宜人有賢德生子三長家琦次殤其三卽生於君卒之

前三日少畦曰猶有天理此子必昌名之曰家理女子
子四存者一曰佩珍

論曰君爲人惟守蘭畦公遺訓以忠厚樸實四字自勵
嘗曰官是身外物名是終身事若有官而無名是求榮
而反辱嗚呼以君之志而又濟之以才使天假之年功
業當不在蘭畦公下乃未及四十而卒是可悲矣君與
少畦兄弟之篤爲當代所罕見余爲君傳兼以塞少畦
之悲且願少畦善自愛勿令蘭畦公之後竟無繼者也
傳君江峯傳

君諱岱字應谷其家譜名廣佐應試易今名傳氏浙江

諸暨人所居在邑東南曰梅嶺有谿山之勝因又自號曰江峯昆弟五人君居次父以子眾議異爨屢諫不從分居之後仍與諸弟從其父居後其五弟歿弟婦樓守義不嫁有欲奪其志者君力護持之許以己子爲之嗣事乃解今樓已五十餘且抱孫焉於是咸稱君孝友云咸豐四年以詩賦受知於學使萬藕舲先生入縣學十應省試不售而文名藉藉里黨間爭延課其子弟厯主許氏黃氏斯氏虞氏徐氏趙氏周氏陳氏皆浙東巨族也其教人爲文論書理文法細入豪芒而君文章敏捷嘗一日成文十篇同人驚爲宿構有二子曰振海曰振

湘晚年每挈之自隨而親教之課程極嚴然又謂之曰
讀書以變化氣質爲貴有以讀爲讀者有以不讀爲讀
者春秋佳日山水勝處禽魚草木皆文章也釣游風詠
皆學問也拘拘書囚奚爲乎梅嶺之下有地曰雙溪君
每往釣於是語二子曰不在得魚臨流小坐最足養人
性靈耳振海嘗蒐輯邑中先輩遺詩將刻以行之君曰
兒志非不高然年少望輕且以古聖賢爲己之學自勵
勿亟亟於此二子謹遵其教皆有成立及君歿乃繪梅
嶺課子圖徧徵名人題詠志永慕也當粵寇之亂避居
鄉間歲饑乏食儒流皆束手待斃君幼負習知穡事乃

躬耕十畝以自給雖老農謝不如及寇平曰聖主
中興吾儕可投耒矣仍歸梅嶺舊居途遇餓夫數輩予
以錢分以糧資之使還塗人感歎光緒七年某月日以
疾卒於家年五十八娶同邑杜氏讀書通大義助君教
子其子嘗言吾父之教嚴而寬吾母之教寬而嚴可知
其善教矣子二人振海振湘也往年潘繹琴學使續刻
兩浙輶軒錄振海奉君梅嶺遺藁一卷以進學使爲采
錄數篇君詩文不自收拾存者無多然有此亦足傳君
矣光緒二十三年振海以選拔生貢成均余歎曰梅嶺
之風遠乎哉振海肄業詁經精舍師事余請爲君傳因

據其所撰行述掇著於篇

論曰宋永嘉李之彥著東谷所見一卷自稱游歷五十年教公卿大夫之子孫屢矣教白屋之類亦多是其人乃老塾師也今君以文藝教授生徒厯主諸巨室梅嶺遺稿固宜與東谷所見並傳矣然李之彥不聞有令子而君二子皆賢振海已名動公卿間是又非李之彥所及也 國朝有錢氏夜紡授經圖世稱母教今梅嶺課子圖父教也二子尙無負此圖哉

蔡節婦傳

蔡節婦戴氏德清人父戴田邑諸生也母沈節婦生而

嚴重自始齟至成人不一窺外戶年十四歸於蔡其夫
蔡篤慶亦十四歲早喪父母育於祖母故自幼失教無
恆業終日惰游踰躐市廛夕或不歸至十八歲一朝走
失偵探無蹤或曰死矣或曰猶在某所然其人則竟絕
祖母老而多病家又貧也婦搢搢奉之旣歿乃歸依母
氏藉女工自活咸豐十年邑陷於賊婦走匿鄉間幸不
死亂定而返以祖姑及舅姑皆野厝未葬積鍼黹所得
具薰裡而掩之終身布衣蔬食葷血不入口時兵火之
後暴骨如莽游魂無依魍魎求食婦爲持誦佛家經呪
輒有驗自失所天守節垂四十年而終傳者不言卒於

何年亦莫知其年如干也

論曰自古至今稱節婦者夥矣然皆夫死守節者也蔡節婦于歸四載孀居終身而實未得其夫死耗唐李德武妻裴氏以夫徙嶺南宋周渭妻莫氏以夫避地北去皆勞苦獨居時稱節婦然彼二人者其夫皆復歸與完聚婦勞苦殆有過之而夫竟不歸嗚呼是尤可哀矣

西圃潘君家傳

君諱遵祁字覺夫別字順之自號西圃潘氏其先自歙遷吳世爲吳著姓君爲榕皋先生之孫理齋先生之子世繫炳然可無述焉道光六年君與弟補之君同入吳